



# RISALAH MAULID JAWI

*Riwayat ringkesipun Bendara  
Kanjeng Nabi Muhammad  
shallallahu alaihi wasallam*

Kasusun dening piyantun ingkang  
banget ngarep-arep pangapurane Gusti,  
Zia bin Taufiq al-Jawi

*Niyat ingsun maos riwayatipun  
Bendara Kanjeng Nabi Muhammad  
kanthi tresna lan branta,  
mugi amrih ridhonipun Gusti Allah  
lan syafaatipun Rosululloh  
Alfatihah.*

السَّلَامُ عَلَيْكَ زَيْنَ الْأَنْبِيَاءِ  
السَّلَامُ عَلَيْكَ مِنْ رَبِّ السَّمَاءِ  
السَّلَامُ عَلَيْكَ أَحْمَدُ يَا حَبِيبِي  
السَّلَامُ عَلَيْكَ طَه يَا طَيِّبِي

Assalamu alaik, mahkota para nabi  
Assalamu alaik, kinasih Ilahi  
Assalamu alaik, piyantun pinuji  
Assalamu alaik, pepadhang ati

### **PAMBUKA**

أَعُوذُ بِاللَّهِ مِنَ الشَّيْطَانِ الرَّجِيمِ  
بِسْمِ اللَّهِ الرَّحْمَنِ الرَّحِيمِ  
لَقَدْ جَاءَكُمْ رَسُولٌ مِنْ أَنْفُسِكُمْ عَزِيزٌ عَلَيْهِ مَا  
عَنِتُّمْ حَرِيصٌ عَلَيْكُمْ بِالْمُؤْمِنِينَ رَؤُوفٌ رَحِيمٌ

Temen-temen wis rawuh ing sira  
Siji rosul saking bangsa nira  
Kang banget lomane maring ira  
Banget welas ing mukmin sedaya

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا  
الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا

Gusti Allah lan para malekat  
Iku sami ngaturke sholawat  
Dumateng Kanjeng Nabi Muhammad  
Mangka sedulur kabeh wong iman

Monggo ngaturke sholawat salam  
Kelawan salam ingkang temenan

اللَّهُمَّ صَلِّ وَسَلِّمْ وَبَارِكْ عَلَيْهِ

يَا رَبِّ صَلِّ عَلَى مُحَمَّدٍ

يَا رَبِّ صَلِّ عَلَيْهِ وَسَلِّمْ  
Duh Gusti mugi maringi rohmat  
Duh Gusti dateng Nabi Muhammad  
Duh Gusti sarta kaum kerabat  
Duh Gusti sarta para sahabat  
Duh Gusti ugi para awliya  
Duh Gusti ugi para ulama  
Duh Gusti nyuwun den ampura  
Duh Gusti sedaya dosa kula  
Duh Gusti Panjenengan ridha  
Duh Gusti tiyang sepah kula  
Duh Gusti paring gesang beja  
Duh Gusti ugi pejah mulya  
Duh Gusti kula nyuwun pangreksa  
Duh Gusti saking napsu lan hawa  
Duh Gusti paring aman ayem  
Duh Gusti sarta ati tentrem  
Duh Gusti mugi menang lan jaya  
Duh Gusti umat Islam sedaya

اللَّهُمَّ صَلِّ وَسَلِّمْ وَبَارِكْ عَلَيْهِ

### **AKIDAH KITA**

Utawi sedaya puja puji  
Sinembah tetep kagung ilahi  
Gusti Allah kang maha ngratoni  
Pitung sap langit lan pitung bumi

Kang mahaawal tanpa kawitan  
Kang mahaakhir tanpa pungkasan  
Kang mahawujud tanpa panggenan  
Kang mahajejag tanpa tandhingan

أَشْهَدُ أَنْ لَا إِلَهَ إِلَّا اللَّهُ

Nakseni ingsun nekodke ingsun  
Kelawan mantep ing ati ingsun  
Ing saktemene ra ana gusti  
Kejaba namung Allah suwiji

وَأَشْهَدُ أَنَّ مُحَمَّدًا رَسُولُ اللَّهِ

Nakseni ingsun nekodke ingsun  
Kelawan mantep ing ati ingsun  
Ing saktemene Nabi Muhammad  
Utusan Gusti Panyipta jagad

Nabi Muhammad dados pungkasan  
Purna piwulang para utusan  
Awit zaman Kanjeng Nabi Adam  
ingkang yaiku agama Islam

رَضِيتُ بِاللَّهِ رَبًّا وَبِالْإِسْلَامِ دِينًا  
وَبِمُحَمَّدٍ نَبِيًّا وَرَسُولًا وَبِالْقُرْآنِ إِمَامًا

Ridho ingsun dipangerani Gusti  
Allah, ridho ingsun diagamani agama  
Islam, ridho ingsun dirosuli Kanjeng  
Nabi Muhammad, ridho ingsun  
dipanutani kitab Al-Quran

Mangka sedulur muslim sedaya  
Pada weruha ing nabi nira

*Kanjeng Nabi Muhammad  
shallallahu alaihi wasallam*

اللَّهُمَّ صَلِّ وَسَلِّمْ وَبَارِكْ عَلَيْهِ

### **NASABE KANJENG NABI**

Nabi Muhammad putrane Abdullah,  
putrane Abdul Mutthalib kang asma  
Syaibah,

putrane Hasyim putrane Abdu Manaf  
kang asma Mughiroh, putrane Qusoy  
putrane Kilab putra Murroh,  
putrane Ka'ab putrane Luay putrane  
Fihir kang asma Quresy, putrane  
Malik putrane Nadhor putrane  
Kinanah, putrane Khuzaimah  
putrane Mudrikah putrane Ilyas,  
putrane Mudhor putrane Nizar  
putrane Ma'ad putrane Adnan, sak  
penginggil dugi Nabi Ismail, putrane  
Nabi Ibrahim alaihimas salaam

Ibune Nabi Siti Aminah, putrine  
Wahab putrane Abdu Manaf, putrane  
Zuhroh putrane Kilab, sak penginggil  
sami dugi Ibrahim ramane para nabi

Gusti Pangeran tansah mindhahi  
Ing mencoronge nur Kanjeng Nabi  
Saking sulbi ing rahim kang suci  
Kareksa saking lelampah keji  
Dados leluhur rosul pinuji  
*Kanjeng Nabi Muhammad  
shallallahu alaihi wasallam*

اللَّهُمَّ صَلِّ وَسَلِّمْ وَبَارِكْ عَلَيْهِ

يَا رَسُولَ اللَّهِ سَلَامٌ عَلَيْكَ  
يَا رَفِيعَ الشَّانِ وَالْدَّرَجِ

Asmane Nabi kita Muhammad  
Kang dados rohmat sedaya jagad  
Ramane Nabi Sayyid Abdullah  
Ibune Nabi Siti Aminah  
Simbahe Nabi Abdul Muttolib  
Paman kang ngasuh ya Abu Thalib  
Garwa kawitan Siti Khadijah  
Putri kinasih Siti Fatimah

Miyose Nabi ing taun Gajah  
 Daleme wonten ing kuta Mekah  
 Yuswa kawan dasa Nabi dakwah  
 Nyuwijake mung Gusti Allah  
 Banjur Kanjeng Nabi tindhak hijrah  
 Sareng sohabat dugi Madinah  
 Jayane Islam ing Fathu Mekah  
 Kang dadi tandha ajaran rohmah  
 Wafate Nabi kawitan gerah  
 Mugiya kita saget ziarah

اَللّٰهُمَّ صَلِّ وَسَلِّمْ وَبَارِكْ عَلَيْهِ

### PARASE KANJENG NABI

Nabi Muhammad wajahe cerah  
 Parase mesem tansah sumringah  
 Kulite putih lan semu abang  
 Paling baguse makhluk den sawang

Mripate mblalak umpama lintang  
 Gumbala ketel pasurya padhang  
 Granane mbangir bathuk mencorong  
 Dugi talingan remane panjang

Nalika mesem umpama udan  
 Ayem rasane susahe ilang  
 Nalika gunem rasane manis  
 Ing ati adhem kados gerimis

Nalika kempal sareng shohabat  
 Gandhane wangi ra isa ilang  
 Nalika mlampah tingkahe tenang  
 Kados tumurun saking tanjakan

Para shohabat sampun ngendika  
 Ing dene Nabi kados purnama  
 Tanggal limalas ingkang sampurna  
 Wengi kang peteng sinebar cahya

Dhuh beja tenan wong kang mirsani  
 Ing kamulyane wajahe Nabi  
 Ing alam nyata utawa ngimpi  
 Merga setan ra isa madhani

Mugi sedulur kabeh wong Islam  
 Saget kepanggih pyantun suci

*Kanjeng Nabi Muhammad  
 shallallahu alaihi wasallam*

اَللّٰهُمَّ صَلِّ وَسَلِّمْ وَبَارِكْ عَلَيْهِ

### AKHLAQE KANJENG NABI

Nabi Muhammad sampurna insan  
 Akhlaqe Nabi yaiku Quran  
 Sipate jujur aris tur loman  
 Kang mboten goroh gunem lelahan

Remen ngapura ing kesalahan  
 Ananging tetep teges tur lantang  
 Banget welase maring wong miskin  
 Lan bocah yatim tur kekurangan

Padharan Nabi den ganjel watu  
 Marga dhaharan mboten tinemu  
 Gunung nawani emas suwasa  
 Ananging Padhuka mboten kersa

Nabi ngapura wong kang nglarani  
 Masiya mili getih sukune  
 Kelawan ndonga ya mugi-mugi  
 Dadiya Islam anak putune

Minangka angin ingkang sumilir  
 Yaiku sipat lomane Nabi  
 Minangka kembang wangi gandhane  
 Yaiku sipat akhlaqe Nabi

*Kanjeng Nabi Muhammad  
shallallahu alaihi wasallam*

اَللّٰهُمَّ صَلِّ وَسَلِّمْ وَبَارِكْ عَلَيْهِ

### **WIYOSANE KANJENG NABI**

Kanjeng Nabi miyos dinten Senen  
Robiul Awal riwayat paten  
Tanggale rolas miturut khobar  
Wayahé tepat tumuju fajar

Nalika ngandhut Siti Aminah  
Mboten ngraoske abot lan payah  
Ingdalem wayah miyose Nabi  
Arasye goncang langite padhang  
Angkasa jembar gumebyar gebyar  
Malekat muji dateng Pangeran

سُبْحَانَ اللَّهِ وَالْحَمْدُ لِلَّهِ  
وَلَا إِلَهَ إِلَّا اللَّهُ وَاللَّهُ أَكْبَرُ (۳)

Geni Majusi ing tanah Parsi  
Jare abadi dumadak mati  
Ugi ambruk patbelas berhala  
Ingkang sinembah ing tanah Kisra

Lan setan-setan padha dibalang  
Kelawan panase lintang-lintang  
Iku sedaya tandha kang cetha  
Miyose Nabi ingkang pungkasan

Bungah sumebar ing mayapadha  
Marga lahire cahya utama  
Ayo sedulur dha jumenenga  
Hadirna ati jiwa lan raga

صَلَّى اللَّهُ عَلَى مُحَمَّدٍ صَلَّى اللَّهُ عَلَيْهِ وَسَلَّمَ  
صَلَّى اللَّهُ عَلَى مُحَمَّدٍ وَعَلَى آلِهِ وَسَلَّمَ

يَا نَبِيَّ سَلَامٌ عَلَيْكَ  
يَا رَسُوْلُ سَلَامٌ عَلَيْكَ  
يَا حَبِيْبُ سَلَامٌ عَلَيْكَ  
صَلَوَاتُ اللَّهِ عَلَيْكَ

Dhuh Nabi agung minulya  
Purnama ingkang sampurna  
Madhang ati kang lena  
Nambani jiwa kang lara  
Dhuh Nabi luhur pinulya  
Matur sowan kula niki  
Kanthi branta rina lan wengi  
Mugiya tresna ditampi  
Dhuh Nabi nyuwun syafaat  
Pitulung dinten kiamat  
Kawula ahli maksiat  
Mugi slamet dunya akherat  
Dhuh Nabi rohmat Pangeran  
Tanpa wates lan pitungan  
Ingatase panjenengan  
Lan keluargi sekalian  
Dhuh Nabi salam kawula  
Katur saklawase mangsa  
Dumateng Tuan Padhuka  
Mugi kempal ing suwarga

اَللّٰهُمَّ صَلِّ وَسَلِّمْ وَبَارِكْ عَلَيْهِ

### **DAKWAHE KANJENG NABI**

Nabi Muhammad tinampi wahyu  
Tandhane awal den angkat rosul  
Ing gua Hiro kang dadi saksi  
Tumurun ayat Quran kang suci

Nuli Pangeran aweh perintah  
Ing Kanjeng Nabi supaya dakwah  
Nyuwijiake Allah Kang Suci  
Piwulang tauhid ingkang sejati

Bendara Nabi ngawiti dakwah, ing  
keluarga kaum kerabat, percaya tenan  
Siti Khodijah Sohabat Ali, lan Abu  
Bakar, lan Zaid bin Haritsah, Sohabat  
Bilal lan Utsman lan Sa'ad lan Sa'id  
lan Tholhah, ugi Abdurrohman bin  
Auf lan Sofiyah

Kanjeng Nabi dakwah kanthi terang  
Ing kaum Quresy kelawan lantang  
Supaya tinggal nyembah berhala  
Lelaku jahiliyyah kang nyata

Mangka dha nentang ing Kanjeng Nabi  
Serta nglarani lan nyupatani  
Den balang watu iku biasa  
Akeh sohabat ingkang den siksa

Den goda banda dunya kang mewah  
Kanjeng Nabi jejeg mboten owah  
Nampi pilara ingdalem dakwah  
Kanthi sabar sarta istiqomah  
Inggih punika dakwah Padhuka  
*Kanjeng Nabi Muhammad  
shallallahu alaihi wasallam*

اَللّٰهُمَّ صَلِّ وَسَلِّمْ وَبَارِكْ عَلَيْهِ

#### **ISRO' MI'ROJE KANJENG NABI**

Nabi Muhammad dipun lampahke  
Malekat Jibril dados rencange  
Saking Masjidil Harom ing Mekah  
Dugi Al-Aqsho kang luber berkah

Ing Baitul Maqdis Nabi ngimami  
Para utusan lan para nabi  
Banjur Padhuka tindhak tumuju  
Mabur ing langit kang lapis pitu

Ing pitung langit Nabi kepanggih  
Para anbiya ingkang pinilih  
Rikala Mi'roj Padhuka pirsu  
Ing ajaibe swarga neraka

Ana mbok tua kriput rupane  
Umpama dunya lan sak isine  
Ana wong ajur pecah sirah  
Iku wong abot solat fardhune

Ana kang wajahe dicakari  
Iku wong kang senenge ngrasani  
Ana wong kang digunting ilate  
Iku kang nulayani cramahe

Hingga dumugi Nabi piyambak  
Ing puncake Sidrotul Muntaha  
Nuli tinampi jimat kang mulya  
Wajib solat fardhu kang lima

Subuh dzuhur ashar maghrib isya  
Kabeh dijaga ja nganti lena

Ayo sedulur pada matura  
Salam dumateng piyantun mulya

*Kanjeng Nabi Muhammad  
shallallahu alaihi wasallam*

اَلسَّلَامُ عَلَيْكَ أَيُّهَا النَّبِيُّ وَرَحْمَةُ اللهِ وَبَرَكَاتُهُ (۳)

اَللّٰهُمَّ صَلِّ وَسَلِّمْ وَبَارِكْ عَلَيْهِ

#### **HIJRAHE KANJENG NABI**

Nabi Muhammad nglampahi dakwah  
Ingkang rekasa lan susah payah  
Dipun larani wong kafir Mekah  
Hingga tinampi perintah hijrah

Para shohabat sampun lumampah  
Andoh dumugi negeri Habsyah  
Telulas taun dakwah ing Mekah  
Banjur hijrah dumugi Madinah

Sohabat muhajirin lan ansor  
Kaum muslimin dadi sedulur  
Masjid kawitan ing desa Quba  
Ingkang den bangun kelawan takwa

Umat Islam dadi makmur kokoh  
Imane aman negrine bakoh  
Gusti Allah mpun ngrestoni perang  
Badar lan Uhud lan pirang-pirang

Taun kawolu takluke Mekah  
Ingkang sinebut Yaumul Marhamah  
Perkara batil den gusur ilang  
Ingkang haq menang gilang gumilang

Haji wada' ing taun sepuluh  
Para sohabat dha neteske luh  
Amarga iku dadi pertandha  
Cedhak wayah Kanjeng Nabi seda

Wonten ing yuswa sewidak tiga  
Padhuka Nabi kapundhut seda  
Ayo sedulur dha maturnuwun  
Dateng Bendera ingkang sinuwun

*Kanjeng Nabi Muhammad  
shallallahu alaihi wasallam*

اللَّهُمَّ صَلِّ وَسَلِّمْ وَبَارِكْ عَلَيْهِ

### **TRESNANE KANJENG NABI**

Nabi Muhammad banget tresnane  
Maring kita sedaya umate  
Nyuwun ampura ing saben sholat  
Kanggo kita kang ahli maksiat

Para nabi gadhah donga hebat  
Kang wis den suwun ing alam dunya  
Kejaba nabi kita Muhammad  
Rupa pitulung awah syafa'at

Wonten riwayat hadits kang soheh  
Dhawuhe Kanjeng Nabi kinasih;  
“Dhuh bungah tenan menawa ingsun  
Bisa ketemu sedulur ingsun.”  
Para sohabat ya penasaran;  
“Napa tah kita niki sedaya  
Iku sanes dulur panjenengan?”

Den jawab Nabi kanthi ngendika,  
“Sira kabeh ya sohabat ingsun,  
Anapun utawi dulur ingsun  
Yaiku wong kang iman ing ingsun  
Nanging ra tau ketemu ingsun.”

Sedulur kabeh kaum mukminin  
Bungaha sira gedhekna ati  
Awak-awakan kang ina iki  
Temen den kangen Kanjeng Nabi  
*Kanjeng Nabi Muhammad  
shallallahu alaihi wasallam*

اللَّهُمَّ صَلِّ وَسَلِّمْ وَبَارِكْ عَلَيْهِ

Mugi sholawat salam  
Katur rina lan wengi  
Dumateng kanjeng nabi  
Makhluk paling pinuji

مَوْلَايَ صَلِّ وَسَلِّمْ دَائِمًا أَبَدًا  
عَلَى خَيْرِ خَلْقٍ كُلِّهِمْ

Kanjeng nabi kekasih  
Kang bakal mitulungi  
Saking bebaya dunya  
Akherat lan bilai

هُوَ الْحَيِّبُ الَّذِي تُرْجَى شَفَاعَتُهُ  
لِكُلِّ هَوَلٍ مِنَ الْأَهْوَالِ مُشْتَجِمٍ

Berkat pangkate nabi  
Kulo nyuwun duh gusti  
Dosa dipun resiki  
Donga den sembadani

يَا رَبِّ بِالْمُصْطَفَى بَلِّغْ مَقَاصِدَنَا  
وَاغْفِرْ لَنَا مَا مَضَى يَا وَاسِعَ الْكَرَمِ  
Mugi sedaya umat  
Kanjeng Nabi Muhammad  
Tansah pinayung rohmat  
Dugi dina kiamat

يَا أَرْحَمَ الرَّاحِمِينَ يَا أَرْحَمَ الرَّاحِمِينَ  
يَا أَرْحَمَ الرَّاحِمِينَ فَزِجْ عَلَى الْمُؤْمِنِينَ

اللَّهُمَّ صَلِّ وَسَلِّمْ وَبَارِكْ عَلَيْهِ

### DONGA

الْحَمْدُ لِلَّهِ رَبِّ الْعَالَمِينَ وَالصَّلَاةُ وَالسَّلَامُ  
عَلَى إِمَامِ الْمُرْسَلِينَ سَيِّدِنَا مُحَمَّدٍ  
وَعَلَى آلِهِ وَصَحْبِهِ أَجْمَعِينَ

Dhuh Gusti ingkang Mahakuasa  
Kang Mahaasih Murbamesesa  
Nyuwun ampura sedaya dosa  
Lan keluputan kula sedaya

Dhuh Gusti kanthi pangkate Nabi  
Mugiya umur dipun berkahi  
Mugiya ibadah dipun tampi  
Netepi iman nalika mati  
Tebihke saking neraka geni  
Mlebet swarga nikmat abadi

Dhuh Gusti kanthi berkahe Nabi  
Paringi qobul sedaya hajat  
Paringi tutup sedaya cacat  
Paringi mantun sedaya mriyang  
Paringi lunas sedaya utang  
Sedaya susah paringi gampang  
Sedaya akal paringi padhang  
Sedaya ati paringi tenang  
Usaha lancar rejeki jembar  
Kaum muslimin paringi aman  
Saking dzolimin lan makar setan

Dhuh Gusti mugi saged pinanggih  
Para kekasih piyantun sholih  
Ing alam dunya ngimpi lan nyata  
Ugi mbenjing ing tetaman swarga

وَصَلَّى اللَّهُ عَلَى سَيِّدِنَا مُحَمَّدٍ وَعَلَى آلِهِ  
وَصَحْبِهِ وَسَلَّمَ سُبْحَانَ رَبِّكَ رَبِّ الْعِزَّةِ  
عَمَّا يَصِفُونَ وَسَلَامٌ عَلَى الْمُرْسَلِينَ  
وَالْحَمْدُ لِلَّهِ رَبِّ الْعَالَمِينَ آمِينَ  
بَيْتَةِ الْقُبُولِ وَإِلَى حَضْرَةِ الرَّسُولِ  
الْقَاتِحَةِ



فوساك  
مانتر جفد